

BISTA ATRAS RIBA CARNAVAL 98 (1)

Pa: Juby Naar

Awe nos ta tira un bista riba e carnaval cu ta tras di lomba. Cu e tabata bunita, luhoso, precioso, manera custumber, mi tin cu bisa cu esaki ta "Danki na gruponan di Carnaval" cu a participa.

Nos a pasa den un carnaval cu manera ta custumber ultimo añanan, cu ni e pueblo carnalesco, ni SAC cu ta e organisador, no tin nada di bisa, pasobra carnaval ta di polis.

Ta polis ta dicidi si tin jump up si of no, si tin parada si of no, si tin actividad si of no, mirando e desaroyo.

Polis ta dicidi riba comienzo y fin di parada, y lo para parada si no ta na nan agrado.

Polis ta dicidi riba concursionan di Roadmarch/calypto y tumba y ta stipula ora pa termina.

E extra ora cu polis ta duna despues di calypso y roadmarch, ami personalmente no ta kere den e "bondad" aki.

Sinembargo mi mester remarca cu mi ta kita sombra pa e polisnan cu a mula curpa dia y anochi durante ultimo tres finnan di siman. Cu tanto di nan a subi caya, mi a haya un exageracion.

COMIENZO DI CARNAVAL

E aña aki atrobe Carnaval a cuminsa "sin sabor carnalesco". E "boom" di carnaval caminda tur hende local y bishitantenan ta bin celebra "comienzo di carnaval" a keda afo.

Pa esaki mi tin un proposicion cu mi lo manda pa SAC-- pa nan por discuti y aproba of keda sin aproba,-- e dianan aki cu cos calma mas despues di eclipse di awe.

E comienzo di carnaval mester ta un fiesta, y sin cu ta polis ta dicidi si e por sigui of no. Ta SAC ta autoridad maximo di Carnaval. Nos no ta biba den un estado policial, aunque tur indicacion ultimo añanan den tur cos ta den e direccion aki.

PROGRAMA

E prome critica di organizacion cu mi tin awe ta riba e programa di Carnaval. Dia 11 di november ta saca "un programa tentativo" cu ta wordo publica.

Despues continuamente ta tende cu mester tene cuenta cu ta un programa "tentativo".

Na principio di januari "e programa Oficial" a sali, y kico nos a mira? Tumba, calypso/roadmarch, tumba juvenil, roadmarch juvenil, parada di flambeuw, entre otro a wordo cambia di fecha, pasobra "no tabata tin organizacion" ni "planificacion" di tur esaki manera debe ser.

Parada di blaas San Nicolas no tabata mes riba programa, y Mini Masquerade den Cas di Cultura no a sigui mes.

Tur e cosnan aki mester ta planea y organiza di antemano, prome cu saca un programa oficial.

Durante aña tin tur oportunidad pa organiza, cera contratonan, hinca programa den otro, duna informacion, stimula participacionnan, haci promocionnan necesario etc. Ora e programa OFICIAL sali, esaki mester wordo ehecuta manera organiza y planea.

PRINS Y PANTHO

E actividad di prins y pantcho e aña aki atrobe a muestra un decadencia.

No tin planificacion, ni organizacion ni coordinaciona.

Atrobe mi tin cu "critica" esaki, y atrobe mi tin cu muestra riba e "nivel" cu ta bayendo mas y mas atras. E tiramento di chiste, e ponemento di publico hari barica yen for di comienzo te fin, ta scondi asina profundo, cu ta cu dolor un pareha por haya "poco di esnan presente" pa hari.

Prins y Pantcho a bira schets teatral sin contenido, sin humor, caminda e menos di 100 hende presente durante

mayoria di atardi y anochi, ta consumi nan mes, conversa, come y bebe, sin sa mes cu ta un concurso ta tumando lugar.

Esaki ta un actividad cu pa Prins y Pantcho infantil mester por atrae MIL hende minimo, y pa Prins y Pantcho Juvenil y Grandi cu ta combina, MESTER por atrae por lo menos MIL hende tambe, cu mester por goza di cada minuut.

PRINS Y PANTHO (2)

Nos ta bay pa CARNAVAL 45. Un lustro.

Pa e lustro aki Eleccion di Prins y Pantcho mester ta un exito, un exito GRANDI.

Pa esaki mester cuminsa pidi registracion di e parehanan. Mester exigi cu nan tin un Sponsor nan tras.

Mester pone fecha final di inscripcion. Mester screen e parehanan pa evita problemanan despues.

Mester pone un fecha pa por screen kico e participantenan ta bin cune. (Por haci esaki cu un comision di 3 cu ta scucha cada participante riba cierto dia y ora stipula)

Mester publica reglamentonan pa esnan cu kier participa ta na altura di dje y tambe e publico cu lo bay presencia e evento.

Tur esaki, den un periodo caminda cu cada pareha por haci nan promocionnan necesario pa atrae publico y haci nan preparacionnan pa duna lo mihor cu tin "como competencia".

E actividad mester ta organiza di antemano, y no den e sistema caminda cu na ultimo ora ainda ta buscando candidato un ora despues cu e show mester a cuminsa.

MRS CARNIVAL

E show di Mrs. Carnival e aña aki a resulta un exito. E comision a cuminsa traha algun siman despues di carnaval, y planificacion y organizacion tabata e exito di e anochi aki.

Lo unico cu a falta tabata

e promocionnan necesario di candidatnan y nan organizacion cu nan a representa.

Sinembargo, Mrs. Carnival a resulta den un di e actividadnan mas atractivo y cu a laga eleccion di Prins y Pantcho leeuw.

Esaki ta un actividad cu ta crece aña pa aña y e organizadornan mester bay percura awor pa no laga "vulgaridad" caba cu Mrs. Carnival, manera el a caba cu Prins y Pantcho.

Mi tin entendi cu ya e comision ta moviendo riba e eleccion di otro aña cu ta nan prome Lustro.

Pa e actividad aki mi ta kita sombra pa e organizadornan y e participantenan y pabien na Mrs. Carnival y su organizacion Hospijolies.

ELECCIONNAN

E eleccionnan di reinanan e aña aki a resulta exitoso atrobe. E shownan tabata menos lucrativo cu den pasado sinembargo bunita.

Lo unico cu mi no a gusta ta stage di e eleccion di reina di Carnaval.

Tabata conoci cu e ta wordo transmiti pa Corsow y Bonaire via television. Por a duna e "stage" un decoracion pa saca cara y no cu un decoracion cu a laga hopi di desea.

Di un "insider" di SAC a ser remarca cu "hende cu no sa di drecha ni coordina backstage, laga esaki pa esnan cu tin e experiencia."

Tambe a comenta cu mester haci e decision di jurado mas honesto posible manera tabata antes cu ta pidi un persona di publico pa "recheck scoring-sheet" pa evita problema.

E comentario di "inside" a menciona cu juradonan di reina grandi tambe lo a muestra riba irregularidad cu lo a tuma lugar. E punto aki mi ta laga pa si encaso investiga e presunto irregularidad, pa mi mira si e ta cuadra cu locual a yega na mi persona di "inside".

TRASPASO DI MANDO

E aña aki e traspaso di mando a bay sin smaa. Sistema di sonido a haci falta, no tabata tin ambiente carnalesco, y e "mandatarionan" di carnaval y gobierno a haya nan mes ta tene discurso pa publico morto, pa despues sigui pa e roundtrip cu ta termina na San Nicolas.

E actividad aki mester di un "push" cu un publicidad enorme y organiza na otro lugar caminda tur esnan presente por sinti cu nan ta forma parti di otro actividad importante. E actividad mester ta organiza cu un programa cu ta cuminsa 9.30 or, sigui 10 or pa traspaso y termina 11 or cu su actividad carnalesco "festivo" organiza.

E aña aki tabata mescos cu e actividad no a tuma lugar mes.

riba esaki tambe mi tin un proposicion pa manda pa SAC y cu nan lo ta liber di acepta of no acepta.

COCYOYOCO Y

JOUVERT MORNING

Nos por a nota cu Co-



pasobra NAN no ta presenta na tempo, a pesar cu ta cuminsa na tempo, y ta te mey mey di e actividad ta mira un poco movecion.

Di awor caba mester cuminsa stimula bandanan y cantantenan pa prepara pa Dia 24 di Januari y laga e fecha aki como fecha oficial pa tumba (of calypso dependiendo di e temporada su largura).

E inscripcion mester bira un happening y e aña aki na "Cheers" e prome paso cu musica y BBQ y transmision radial a tuma lugar.

E actividad aki mester ta organiza di e forma cu for di 11 or mainta happening ta cuminsa y pa 8 or anochi, tur medio di comunicacion tin PROGRAMA OFICIAL caba den nan man di e concurso di TUMBA y sa kende ta cantante, banda, titulo di tumba, arreglista, compositor y ki ora nan ta actua.

Tur aña tin registracion y e desorganizacion ta haci tambe cu te hasta riba escenario, maestronan di ceremonia ainda no tin nomber di tumba, arreglo y compositornan, mientras cu e publico cu ta ser spera e anochi ey no tin idea di kico nan lo por spera durante e actividad. Asina naturalmente no ta atrae publico tampoco.

TUMBERITO

E cambio di fechanan etc. e aña aki tabata "un golpi mortal" pa e actividad di "tumberito". Mi ta sigur cu si na e momento di lesa esaki e lector puntra 100 hende kende tabata "Rey (of reina) di tumba infantil y juvenil" e aña aki, 80 pa 90 sigur no sa. Esaki tabata e actividad di mas malo promovi. Esaki a resulta e actividad cu a tuma lugar y cu mayoria di hende no tabata sa mes cu el a tuma lugar.

Organizacion, y planificacion a falta atrobe. Ta e mes problemanan mencionan cu Prins y Pantcho, Tumba, Calypso y Roadmarch, a tuma lugar aki atrobe.

E aña aki tabata e aña di mas malo pa "Tumberito".

CALYPSO Y ROADMARCH CONTEST

E aña ki concurso di calypso/Roadmarch a bolbe cas. E exito e aña aki mas bien tabata e arreglo cu SAC y ASOMA a yega na dje cu a pone cu e bandanan y cantantenan a prepara sin problema grandi "batiendo den nan cabez".

E fiesta di registracion, etc. manera menciona ariba cu Tumba, tabata falta.

E publico a acudi na grandi pasobra e concurso a "bolbe cas". E exito no ta debi na organizacion, ni na promocion. E exito (di anochi final) aki ta debi na e publico, bandanan y cantantenan y e tranquilidad cu tabata existi e aña aki. Hunto cu esaki e competencia cu a sali for di e prome dos anochinan (cu tabata menos exitoso).

ROADMARCH

DI MUCHA

E catastrofe di e aña aki tabata e concurso infantil y juvenil di roadmarch cu a bira e debacle di carnaval.

Aki ta cambio di fecha, lugar, falta di organizacion, falta di planificacion a hunga un papel grandi.

No ta solamente a fayonan tecnico tira riba e agrupacion musical.

Locual a resalta atrobe ta metemento di familia di participantenan den e concurso aki.

E aña aki mescos cu ultimo dos aña mi a skirbi den POPO pa adultonan laga e concurso aki keda algo di mucha y no mete, pero e peticion no a duna resultado.

Na final ta masha insulto a pasa via onda di emisoranan, masha expresion di discriminacion, y tur esaki relaciona cu henter e desaroyo di e anochi y e MAL Organizacion di e evento. Kico a pasa? Mescos cu tumberito. E ganadornan a haya casi nada di promocion e aña aki. Reina Josey, a keda den "picture" danki na su popularidad.

LIGHTING PARADE

E actividad aki un biaha mas a resulta den exito grandi. Bao di e nivel di exito mi no tin palabra pa expresa.

Tin hende cu kier mire tur aña manera e ta, despues di parada di Noord y prome cu Parada di Playa.

Ayera a tende comentario cu "parada di kimamento di Momo" a bira jump up sin toque carnalesco y cu ta mihor pa cera carnaval cu "Lighting Parade" di Tivoli.

E parada di Kimamento di Momo cu mi a mira, mi a califica mas bien como un "Momo Night" cu su jump up, pero cu lo no mester tin nada di mencion di carnaval y clausura di carnaval.

For di awor caba SAC mester cuminsa traha riba su programa di otro aña y den acuerdo cu Tivoli riba "Lighting Parade", si ta verdad cu Polis tin intencion di trece cambio pasobra nan tin cu traha cu Cocoyoco, Parada di Noord, Lighting Parade y parada di mucha na Playa". planificacion y organizacion mester cuminsa AWE y no MAÑAN.

Den edicion di mañan ta bini cu e di 2 parti pa clausura e "Bista atras riba carnaval" y na mes momento cu sugerencianan cu lo por drenta prome cu mi traha riba dje.

